



Na osnovu člana 22 Statuta Brčko distrikta BiH – prečišćeni tekst (Službeni glasnik Brčko distrikta BiH, broj 2/10), člana 64 Poslovnika o radu Skupštine Brčko distrikta BiH (Službeni glasnik Brčko distrikta BiH, brojevi 17/08 i 20/10), Zaključka Skupštine Brčko distrikta BiH broj: 01-02-132/17 od 10. 5. 2017. godine, a nakon razmatranja Prijedloga mjera za otklanjanje problema u funkcionisanju JP „Komunalno Brčko“ Komisije za komunalnu, javnu djelatnost i zaštitu okoliša Skupštine Brčko distrikta BiH broj: 01.13-02-486/17 od 22. 5. 2017. godine i mjera Komisije za borbu protiv korupcije Skupštine Brčko distrikta BiH broj: 01-05-495/17 od 23. 5. 2017. godine, Skupština Brčko distrikta BiH, na I. nastavku 12. redovne sjednice održanom 7. juna 2017. godine, donosi

O D L U K U

O USVAJANJU PRIJEDLOGA MJERA ZA OTKLANJANJE PROBLEMA U FUNKCIONISANJU JP „KOMUNALNO BRČKO“

Član 1

Usvaja se Prijedlog mjera Komisije za komunalnu, javnu djelatnost i zaštitu okoliša Skupštine Brčko distrikta BiH kako slijedi:

1. Donijeti zakon o izmjenama i dopunama Zakona o javnim preduzećima u Brčko distriktu BiH (pooštriti i precizno propisati: formiranje, sastav i nadležnosti upravnog odbora; identifikaciju kompetencija i kvalifikacija koje trebaju posjedovati članovi upravnog odbora; ko ne može biti biran u upravni odbor; nadležnosti upravnog odbora u vezi sa strateškim upravljanjem preduzećem, nadzorom i kontrolom rada menadžera, izvještavanjem osnivača i upravljanje rizicima; izbor i razrješenje članova upravnog odbora; izbor i razrješenje menadžmenta; obaveze i odgovornosti članova upravnog odbora prema osnivaču; raspolaganje sa ostvarenom dobiti i dr.). Rok je 60 dana.

2. Donijeti odluku o izmjenama i dopunama Odluke o osnivanju Javnog preduzeća „Komunalno Brčko“ tako što će se prilagoditi izmjenama u Zakonu o javnim preduzećima u Brčko distriktu BiH. Rok je 60 dana.

3. U skladu s izmjenama Zakona o javnim preduzećima u Brčko distriktu BiH i izmjenama Odluke o osnivanju Javnog preduzeća „Komunalno Brčko“ pristupiti izmjenama Statuta i pravilnika Preduzeća kako bi se izvršilo njihovo usklađivanje s aktima više pravne snage.

4. U okviru mjera, imajući u vidu nužnost smanjenja rashoda za radnu snagu, Upravni odbor i menadžment obavezni su provesti usaglašavanje plata zaposlenih u administraciji Javnog preduzeća „Komunalno Brčko“ s platama u javnoj upravi. Rok odmah po dobijanju mjera koje usvoji Skupština.

5. Pristupiti izradi nove organizacije Javnog preduzeća „Komunalno Brčko“ s ciljem optimiziranja organizacionih cjelina primjereno djelatnosti koju obavljaju kao i nivou potreba. Suvišna radna mjesta ukinuti, a zaposlenima shodno stručnoj spremi i osposobljenosti, ako za njima postoji potreba, ponuditi nova radna mjesta. Višak radnika zbrinuti shodno Zakonu o radu, te pristupiti racionalizaciji radnih mjesta kroz izradu programa prijevremenog penzionisanja radnika. Rok je 60 dana.

6. Za novoizrađenu organizaciju uraditi detaljan opis poslova i radnih zadataka kao i analitičku procjenu radnih mjesta radi utvrđivanja koeficijenata složenosti na osnovu kojih će se odrediti plata.

7. Plate se moraju obračunavati i isplaćivati mjesečno shodno ostvarenim poslovnim rezultatima.

8. Iznaci nove poslove za koje Preduzeće posjeduje pretpostavke a sve u svrhu upošljavanja radnika na suvišnim radnim mjestima.

9. Da Upravni odbor Javnog preduzeća „Komunalno Brčko“ izmijeni svoju odluku o linearnom smanjenju cijene rada za 10% koja se odnosi na sve zaposlene na način da se od nje izuzmu zaposleni radnici čija je plata jednaka prosječnoj plati ili niža od prosječne neto plate u Brčko distriktu BiH. Ova mjera vrijedi do provođenja mjere pod rednim brojem 4.

10. Vršiti analizu spornih potraživanja (6.900.000,00KM - vanbilansna potraživanja), te preduzeti sve potrebne radnje za naplatu istih (menadžment Javnog preduzeća „Komunalno Brčko“ mora odrediti radnu grupu u što kraćem vremenskom periodu koja će imati samo ovaj zadatak) i redovno izvještavati Skupštinu Brčko distrikta BiH svakih 30 dana.

11. Javno preduzeće „Komunalno Brčko“ svojim resursima mora preuzeti utuženja kupaca neplatiša, čime se prekida usluga advokatskih kancelarija. Također, Javno preduzeće mora primjenjivati metodologiju prilikom izricanja opomene za kupca, preko tužbe, do naplate potraživanja za sva fizička i pravna lica, gdje će se uspostaviti ravnopravan tretman za sve kupce komunalnih usluga na teritoriji Brčko distrikta BiH.

12. Racionalno upravljati troškovima svih vidova održavanja (voznog parka, informatičke opreme (hardver, softver i dr.), a čime se neće ugroziti normalno funkcionisanje Preduzeća.

13. Izvršiti analizu svih ugovora koje je zaključilo Javno preduzeće „Komunalno Brčko“ s davaocima usluga koje se odnose na informacioni sistem koji se koristi u administraciji, te iznaci rješenje za te vrste usluga.

14. Sva investiciona ulaganja zaustaviti, osim investicija koje su neophodne za normalno funkcionisanje Preduzeća.

15. Potrebno je intenzivirati saradnju između Javnog preduzeća i odjeljenja Vlade Brčko distrikta BiH i drugih javnih preduzeća, kako bi Javno preduzeće „Komunalno Brčko“ dobilo izgradnju infrastrukturnih objekata, te izvršenje kapitalnih investicija u što većem obimu, u skladu s važećim zakonskim propisima.

16. Angažovanje radnika po ugovoru o djelu i povremenim/privremenim poslovima se mora redukovati na način da se angažuju isključivo neophodne struke i zanimanja.

17. U narednom periodu, a najkasnije do isteka ugovora o najmu vozila putem operativnog lizinga, Javno preduzeće „Komunalno Brčko“ treba opremiti s neophodnim sredstvima rada za normalno odvijanje procesa pružanja usluga.

18. Javno preduzeće mora učestvovati u projektima koji se finansiraju iz IPA fondova EU i ostalim projektima koji se tiču komunalne infrastrukture (elektro distributivni sistem, vodovodni sistem, kanalizacioni sistem, odlaganje otpada i sl.) čime bi se obezbijedilo dodatno ulaganje u komunalnu infrastrukturu, a što Javno preduzeće može izvršiti sopstvenim sredstvima.

19. Javno preduzeće „Komunalno Brčko“ treba iskoristiti potencijal sekundarnih sirovina koje se mogu reciklirati, a što bi dovelo do dodatnog izvora finansiranja.

20. Potrebno je izvršiti reviziju i ponovno sklapanje Ugovora o odvozu otpada kod pravnih lica čime bi se naplata odvoza otpada vršila po već utvrđenim pravilima za ovu kategoriju kupaca.

21. Potrebno je što hitnije izvršiti kontrolu isporuke vode u stambenim zgradama na gradskom području te izvršiti priključenje istih u sistem mjerenja potrošnje vode Javnog preduzeća.

22. U saradnji s Odjeljenjem za komunalne poslove izraditi strategiju priključenja seoskih vodovodnih sistema u jedinstveni sistem kojim upravlja Javno preduzeće, te naći model naplate ove usluge na seoskom području Brčko distrikta BiH.

23. Da Javno preduzeće „Komunalno Brčko“ u poslovnom planu ukine sve troškove koji se odnose za reklamu i propagandu kao i donatorska i sponzorska sredstva.

Član 2

Usvaja se Prijedlog mjera Komisije za borbu protiv korupcije Skupštine Brčko distrikta BiH kako slijedi:

1. Potrebno je da Pravobranilaštvo Brčko distrikta BiH dostavi izjašnjenje kojim će obrazložiti razloge davanja pozitivnog mišljenja Javnom preduzeću „Komunalno Brčko“ u postupku nabavke radnih kamiona na osnovu tzv. operativnog lizinga.
2. Potrebno je da JP „Komunalno Brčko“ obustavi angažovanje advokatskih kancelarija za postupke utuživanja kupaca, te da se ti poslovi vrše putem radnih resursa Preduzeća.
3. Predlaže se Skupštini Brčko distrikta BiH da kroz izmjenu postojeće regulative, osnivačkih akata Preduzeća, ustanovi „Nadzorni odbor Preduzeća“ koji će biti odgovoran Skupštini.
4. S ciljem smanjenja nesvršishodnih troškova, potrebno je da JP „Komunalno Brčko“ kroz izmjene poslovnog plana Preduzeća ukine troškove namijenjene za promociju i propagandu.

Član 3

Ova odluka stupa na snagu danom donošenja i objavit će se u Službenom glasniku Brčko distrikta BiH.

Broj: 01-02-150/17

Brčko, 7. 6. 2017. godine

**DOPREDSJEDNIK
SKUPŠTINE BRČKO DISTRIKTA BiH**

Ivo Filipović

Dostavljeno:

1. Predsjedniku
2. Dopredsjedniku
3. Gradonačelniku
4. JP „Komunalno Brčko“
5. Odjeljenju za komunalne poslove
6. Pravobranilaštvu Brčko distrikta BiH
7. Sektoru za koordinaciju politika i opće poslove
- Odsjeku za opće poslove
8. Arhivi